

«O outou te miti no te fenua...»

Ei manaò faaara

Te faaarahia atu nei tātou, te feiā rave veà, e horoāhia atu te pahonora e te tahi maā tatararaa iti no teie na uiraa i roto i ta tatou veà no te āvaē i muri nei.

Te ani-atoā-hia atu nei outou ia horoā mai i tā outou pahonora i niā i teie nā uiraa e piti, e ia faatae mai i te reira i te Piha Ōhipa no tā tātou Veà i te Faatereraa o te Etaretia Evaneria. E tuu-atoā-hia atu te reira mau pahonora nā roto i tā tātou Veà.

E ravehia teie faanahoraa Tuaroi i te mau āvaē atoā, i niā i te hoē o te mau talōraa tei faataahia no te Tapatī Ōroā, e e tuuhia atu i roto i tā tātou Veà, no te faatuātiraa ia tātou te tahi e te tahi, i niā i teie faufaa ta te hui metua i vaiho mai nā te hui tama. E faaitoi-to tātou i te tapeā tutuaau i teie faufaa, ia òre ia riro mai te tahi taoā e faataahia no te tuu atu i roto i te fare vaira tauhaa tahito.

Talōraa : Mataio 5, 13 - 16

Irava Tuaroi : Mataio 5, 13 v.m.

«O outou te miti no te fenua...»

E tahi manaò tatara i niā i te talōraa

I roto i teie parau tā te Fatu e horoā nei i tā na mau pipi, te faahiti nei o ia i te parau no te tahi taoā alta paha tō na e faufaa rahi i roto i te hiōraa a te taata. O tā na ia e faariro nei mai te tahi taoā faufaa rahi e te maitai, no te feiā atoā e tuu i tō rātou tiaturiraa i roto ia na. Te titau nei letu i tā na mau pipi i te tahi huru oraraa o te tiā ia rātou ia rave i roto i te parau no te taviniraa. Na tera huru maitai e tera huru taata faaroo tā rātou e faaite i roto i tā rātou taviniraa, e horoā i te maitai e te hau i roto i te oraraa o te taata, mai te tuhaa atoā no te au ta te miti e horoā ra i roto i te mää.

Aita te Fatu e tuu noa nei i tā na mau pipi i roto i te mau fifi rau atoā e farerei-hia nei e te taata, ia tiā ia rātou ia tatara i te reira. Te titau nei rā te Fatu i te taata ia poiha, e aore ra, ia faahinaaro i te maitai no te ora tei tamatahia e te mau pipi. No te mea, te taata e tuu i te miti i roto i tā na mää, e aore ra, i roto i tō na oraraa, e faatupu mai te reira i te poiha i te pape. Eere anei te reira atoā te auraa no tera parau ta te Fatu ra e : «E òaōaraa to te feiā atoā tei poia e tei poiha i te parautiā, e pahonohia te reira hiaāiraa tō rātou.»

Te titau nei te Fatu i te taata i roto i tera manaò no te poia e te poiha i te ora tā te Atua i faataa no na. No te mea, ia òre te reira hiaāiraa, e pohe te noaa mai, mai te taata atoā tei faaōhipa i te miti tei faatupu i te poiha i roto i tō na tino. Ia òre tera poiha i te pape e pahonohia, e pohe atoā te noaa mai.

I roto i te Pipiria, mea rahi roa te feia tei poia e tei poiha i teie ora horoā noa tā te Fatu i faataa no rātou, e ua pahono o ia i taua mau hiaāiraa no ratou ra. Haamanaò noa na tātou i te parau no te matapō ra o Paretimaio tei titau ia rapaauhia tō na mata. Ua faaora te Fatu ia

na, no te mea, ua ite maitai o Paretimaio e, te ora o tā na i imi noa na, e noaa te reira ia na i teie nei i roto i te puna no te ora, o letu Metia.

I'pilai iho i teie parau no te miti, ua tapiri atoā mai letu i te parau no te maramarama, te tahi maramarama tei titauhia ia āma, e aore ra, ia ānaāna. Te reira atoā te tahi titauraa i te mau pipi, ia riro ei maramarama no teie nei ao. Aita hoi te mau maru-metia tei faarirohia ei maramarama e titauhia ra ia huna i tera maitai i horoāhia ia rātou. Ia òpere rā, ia fanaò te taatoā i te ora. Ia riro mau te feiā atoā tei faataa ia rātou ei òriō-mata e ei pūtariā no te Atua e no te nunaa tā te Atua iho i horoā ia rātou, ei miti no te fenua, e ei maramarama no teie nei ao. Tera nā hohoā e titauhia ra i te feiā faaroo ia faaōhipa i niā i te tino o te fenua nei. Eiaha rā ia vai noa ei hohoā, ia rave hope roa rā i te ōhipa i pūpūhia e te Fatu no te ora i roto i tō rātou rima.

Te uiraa i niā i te irava

Uiraa 1 : E aha te tuhaa i roto i te miti o te òre roa e tiā i te taata faaroo ia faaōhipa i roto i te parau no te taviniraa.

Uiraa 2 : Ia òre te maitai i roto i te miti, nahea te faahoi faahou mai i taua maitai ra.



Tuaroi i Rurutu

Julien Mahaa